

Illuliortiternernut aningaasalersuineq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna Illuliortiternernut aningaasalersuineq pillugu Inatsisartut inatsisaat nr. 39, 23. november 2017-imeersoq, allannguutit ukunani pineqartut ilanngullugit Inissianik aningaasalersuisarneq pillugu Inatsisartut inatsisaat nr. 36, 28. november 2019-imeersoq.

Kapitali 1

Atuuffia

§ 1. Inatsisartut inatsisaat una illunik sanaartornermut, iluarsaassinermit, allilerinermit pitsanngorsaanerimullu taarsigassarsinermit tapiiffigitinnerimullu atorineqarpoq.

Imm. 2. Inissianut inuussutissarsiutinik ingerlatsiffigineqartussanut imaluunniit ingerlatsiviusunut taarsigassarsisitsisoqarsinnaanngilaq tapiiffigineqarsinnaanatillu. Taamaattorli inuussutissarsiutit annikinnerusut namminersorfusut tassani pineqanngillat.

Imm. 3. Inissianik sanaartornermut, iluarsaassinermit, allilerinermit pitsanngorsaanerimullu pisortanit tapiiffigineqartut, tapiissutit imaluunniit aningaasalersuineq pillugu inatsisinut allanut ilaasunut inissianut taarsigassarsisitsisoqarsinnaanngilaq.

§ 2. Inissianik sanaartornermut, pitsanngorsaanermit, iluarsaassinermit imaluunniit allilerinermit piffissami sanaartornermi pilersaarusiornermilu inatsimmik atuuttumik naammassinnittumik sanaartornermut taamaallaat taarsigassarsisitsisoqarsinnaavoq tapiiffigineqarsinnaassallutilluunniit.

§ 3. Taarsigassarsisitsinissamut tapiiffigitinnerimullu neriorsuummik tunniussisoqannginnerani sanaartornissamut pituttuisumik isumaqatigiissusiorfusimanngitsunut imaluunniit sanaartornermi sulinernut aallartinneqarsimanngitsunut taamaallaat sanaartornermut taarsigassarsisitsisoqarsinnaavoq tapiiffigineqarsinnaassallutilluunniit.

Kapitali 2

Nutaanik illuliortiternernut taarsigassarsineq

§ 4. Inissiat nutaat sanaartornerinut aningaasartuutit tamarmiusut ilaannut aningaasalersorneqarnissaannut kommunalbestyrelsi taarsigassarsisitsinnaavoq, tak. §§ 5-8.

Imm. 2. Inissiami inissiap annertussusia 110 m² tikillugu annerpaamik taarsigassarsisitsisoqarsinnaavoq,

inissiap anginerunera apeqquataatinnagu.

Imm. 3. Sanaartornermut aningaasartuutit tamarmiusut m²-imut ataatsimut annerpaamik 20.000 kr.-inut taarsigassarsisitsisoqarsinnaavoq, aningaasartuutit annertuneruneri apeqquataatinnagit.

§ 5. Nuummi aningaasartuutit tamarmiusut 27 %-ii tikillugit kommunalbestyrelsi nutaamik inissialiornissamut taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartumik tassa 594.000 kr.-inik annerpaamik taarsigassarsisitsisoqarluni, taamaattoq tak. imm. 2 aamma 3.

Imm. 2. Imm. 1 malillugu taarsigassarsisitsineq imatut annikilliarortinneqassaaq:

1) 2019-imi taarsigassarsisitsinissamut neriorsuutitut 24 %-it, tassa annerpaamik 528.000 kr.-inik taarsigassarsisitsineq

2) 2020-mi taarsigassarsisitsinissamut neriorsuutitut 21 %-it, tassa annerpaamik 462.000 kr.-inik taarsigassarsisitsineq

3) 2021-mi taarsigassarsisitsinissamut neriorsuutitut 18 %-it, tassa annerpaamik 396.000 kr.-inik taarsigassarsisitsineq

4) 2022-mi taarsigassarsisitsinissamut neriorsuutitut 15 %-it, tassa annerpaamik 330.000 kr.-inik taarsigassarsisitsineq

5) 2023-mi taarsigassarsisitsinissamut neriorsuutitut 12 %-it, tassa annerpaamik 264.000 kr.-inik taarsigassarsisitsineq

6) 2024-mi taarsigassarsisitsinissamut neriorsuutitut 9 %-it, tassa annerpaamik 198.000 kr.-inik taarsigassarsisitsineq

7) 2025-mi taarsigassarsisitsinissamut neriorsuutitut 6 %-it, tassa annerpaamik 132.000 kr.-inik taarsigassarsisitsineq

8) 2026-mi taarsigassarsisitsinissamut neriorsuutitut 3 %-it, tassa annerpaamik 66.000 kr.-inik taarsigassarsisitsineq

Imm. 3. 2027-mi januaarip aallaqqaataanit sunniuteqalersumik Nuummi taarsigassarsisitsinissamut neriorsuineramik nalunaaruteqartoqarsinnaangilaq.

§ 6. Qaortumi, Sisimiuni aamma Ilulissani kommunalbestyrelsi aningaasartuutit tamarmiusut 30 %-ii tikillugit nutaamik inissialiornissamut taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 660.000 kr.-inik annerpaamik taarsigassarsisitsisoqarluni.

§ 7. Maniitsumi, Aasianni aamma Tasiilami kommunalbestyrelsi aningaasartuutit tamarmiusut 35 %-ii tikillugit taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 770.000 kr.-inik annerpaamik taarsigassarsisitsisoqarluni.

§ 8. Illoqarfinni nunaqarfinnilu §§ 6 aamma 7-imi taaneqanngitsuni kommunalbestyrelsi aningaasartuutit tamarmiusut 40 %-ii tikillugit taarsigassarsisitsisinnaavoq, taamaattorli § 4, imm. 2 naapertorlugu annerpaamik naatsorsorneqartut, tassa 880.000 kr.-inik annerpaamik taarsigassarsisitsisoqarluni.

§ 9. §§ 5-8 naapertorlugu taarsigassarsisitsineq taamaallaat pisinnaavoq sanaartornermi aningaasartuutit tamarmiusut sinneri taarsigassarsisup nammineq aningaalersorpagit.

§ 10. §§ 5-8 naapertorlugit taarsigassarsisitsinerit inissiami qularnaveeqqusiussinikkut qulakkeerneqassapput. Sanaartornermi aningaasartuutit tamarmiusut sinnerisa sillimmasiinnermullu akiliussinerit aningaasalersornissaannut inissiami qularnaveeqqusiilluni taarsigassarsineq taarsigassarsisitsinerit ataqqissavaat.

Imm. 2. Taarsigassarsiat atulernissaanut akuersissummut ulluliussamiit ukiuni 20-ni ernialersorneqarnatillu akilersugassaanngillat, tamatumalu kingorna Nationalbankip erniaritittagai procentinik pingasunik ilallugit erniaqartinneqarlutik amerlaqatigiinnik annertussusilerlugit ukiuni 15-ini akilersugassaanngussallutik. Taarsigassarsinermi allagartap qanoq iluseqarnissaa suullu piumasaqaataassanersut kommunalbestyrelsimit aalajangersarneqassapput.

Imm. 3. Taarsigassarsiat akilersornissaannut akiligassallu akilersornissaannut maleruagassanik Naalakkersuisut aalajangersaasinnaapput.

§ 11. § 10, imm. 1-imi illunut pineqartunut atatillugu piginnittut nikinneri tamaasa pillugit kommunalbestyrelsi ilisimatinneqartassaaq. Piginnittut nikinnerini §§ 5-8 naapertorlugit taarsigassarsiat akiligassanngortinneqassanngillat.

Imm. 2. Piginnittut nikinnerini tamani kommunalbestyrelsip taarsigassarsisitsinerani taarsigassarsiat atsiorneqarnerisa angissusiata 15 %-iatut annertutigisumik piginnittut nikinnerannut akiliutissaaq akilernerqartassaaq. Kommunalbestyrelsip taarsigassarsisitsineranik tigusinnermut piumasarineqarpoq piginnittut nikinneranni akiliutip akilernerqarnissaa.

Imm. 3. Atulernissaanut akuersissutip tunniunneqarnerata kingorna qaammatinik arfinilinnik kingusinnerusumik pisunut inissianik nutaatut sanaartorneqartunik tunisinermi taarsigassarsitinneqarnissamut neriorsuummik tunniussineq piginnittut nikinnerattut isigineqarpoq piginnittut nikinneranni akiliummik akiliisussaaffusoq.

Imm. 4. Piginnittut nikinnerini, pisisumit tiguneqartut taarsigassarsiat katinneri aamma niuernermi aningaasartuutit missiliussat tapiliunneri ilanngaatilugit pisinnermi akip 90 %-iinik annerpaamik aningaasartaqartut taarsigassarsiat kommunalbestyrelsip taarsigassarsiarititaasa ataqqissavai.

§ 12. Kommunalbestyrelsip §§ 5-8 naapertorlugit taarsigassarsiarititai akiligassatinneqassapput:

- 1) Erniat taarsigassarsialluunniit akilersuutit akilernerqanngippata, aamma illumi qularnaveeqqusiussaqluni taarsigassarsinermi allagartaq naapertorlugu erniat akilersuutillu akilernissaat pillugu maleruagassat malillugit piffissaliussap naanissaa sioqqullugu akiligassanik akilinngisanik taarsigassarsisoq akiliisimanngippat, tak. qularnaveeqqut pillugu Kalaallit Nunaannut inatsit.
- 2) Taarsigassarsisoq inissiamik illersorneqarsinnaasumik aserfallatsaaliisimanngippat, paasineqarpallu kommunalbestyrelsip qularnaveeqqusiussutikkut qulakkeeriffigisaa taamaalilluni ajornerulersoq.
- 3) Taarsigassarsisup inissiaq ikuallattoornissamut illullu ajoqusersinnaaneranut sillimmasersimanngippagu.
- 4) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
- 5) Inissiami ininik inuussutissarsiorfiusunik aaqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikinnerusut namminersorfiusullu

pineqanngillat.

6) Taarsigassarsisoq piginnittut nikinneri pillugu taarsigassarsisitsisumut nalunaaruteqanngitsoorpat aamma pisunik utoqqatsissutaasinnaasunik peqanngippat.

7) Piginnittut nikinnerini piginnittut nikinnerini akiliummik taarsigassarsisoq akiliinngitsoorpat.

Imm. 2. Imm. 1, nr. 4 taamaaqataanik atorineqassaaq inissiaq inatsisitigut pisinnaatitaasumut pisussaataasumullu attartortinneqarpat.

Kapitali 3

Illunik pioreersunik iluarsaassinerit, pitsanngorsaanerit allilerinerillu

§ 13. Kommunalbestyrelsi inissiat pioreersut iluarsaannerinut, pitsanngorsarnerinut allilernerneqarnerinullu tassani aningaasartuutit tamarmiusut 40 %-ii tikillugit taarsigassarsisitsisinnaavoq taamaattorli annerpaamik 300.000 kr.-inik.

Imm. 2. Inissiamut ataatsimut iluarsaassinernut, pitsanngorsaanerit imaluunniit allilerinerit ataasiaannarluni taarsigassarsisitsisoqarsinnaavoq.

Imm. 3. Allilerinerup kingorna 110 m²-imik annertunerusumik angissuseqartunut inissianut allilerinerit taarsigassarsisitsisoqarsinnaanngilaq.

§ 14. § 13 naapertorlugu taarsigassarsisitsinerit piumasarineqarpoq:

1) Inissiaq inissiamik piginnittumut, taassuma aappaanut imaluunniit meeqqanut inersimanngitsunut inissiatut atorineqassaaq.

2) Inissiaq piffissami qinnuteqarfiusumi ukiunik 20-inik pisoqaanerussaaq.

3) Inissiaq ikualattoornissamut illullu ajoqusersinnaanerit sillimaserneqarsimassaaq aamma sillimasiinerit akiliutissatigut kinguaattoortoqarsimanani.

Imm. 2. Iluarsaassinernut, pitsanngorsaanerit allilerinerimullu aningaasartuutit tamarmiusut sinnerinut taarsigassarsisoq nammineq aningaasalersuissappat taamaallaat taarsigassarsisitsisoqarsinnaavoq.

Imm. 3. Aappaasumut sanilliunneqarpoq nalunaarsorsimalluni aapparisaq, imaluunniit ukiuni 2-ini kingullerni inooqatigiissimappata, katissimanernut assingusumik inooqatigiinneq.

§ 15. Inuulluarniutit taaneqarsinnaasunut iluarsaassinernut imaluunniit pitsanngorsaanerit taarsigassarsisitsisoqarsinnaanngilaq.

§ 16. Inissiami qularnaveeqqusiussinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsisitsisoqassaaq. Inissiami qularnaveeqqusiussinikkut taarsigassarsiaasinnaasut allat taarsigassarsinerup ataqqissavai.

§ 17. Kommunalbestyrelsi taarsigassarsisitsinera, tak. § 13 piginnittut nikinnerini akiligassanngortinneqassaaq, aappariit akornanni piginnittut nikinneri eqqaassanngikkaanni aamma averusernerit imaluunniit avinnerit atavillugu piginnittut nikinneri imaluunniit kommunalbestyrelse allamik aalajangiisimanngippat.

§ 18. Kommunalbestyrelsip taarsigassarsisitsinera tak. § 13 aamma akiligassanngortinneqassaaq:

- 1) Taarsigassarsisoq inissiamik illersorneqarsinnaasumik aserfallatsaaliisimangippat, kommunalbestyrelsillu paasippagu kommunalbestyrelsip qularnaveeqqusiissutikkut qulakkeeriffigisaa taamaalilluni ajornerulersoq.
- 2) Taarsigassarsisup inissiaq ikuallattoornissamut illullu ajoqusersinnaaneranut sillimmasersimangippagu.
- 3) Inissianik attartorneq pillugu inatsisartut peqqussutaanni attartortitsineq pillugu aalajangersakkanut akerliusunik inissiamik taarsigassarsisoq attartortitsippat.
- 4) Inissiami ininik inuussutissarsiornermut aqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiuutilli annikitsut namminersorfiusullu ilaangillat.
- 5) Inissiaq taarsigassarsisitsisumut initut atorneqanngippat.

Imm. 2. Imm. 1, nr. 3 taamaaqataanik atorneqassaaq inissiaq inatsisitigut pisinnaatitaasumut pisussaataasumullu attartortinneqarpat.

Kapitali 4

Illunik pioreersunik soraanermusialinnut pigineqartunik iluarsaassinerit

§ 19. Soraanermusialimmit inissiatut atorneqartunut aamma soraanermusiaqartoq taassumalu aappariunnagaa marluullutik inissiamik kisimiillutik pigineqartumut inissiamik pioreersumik iluarsaassinerit kommunalbestyrelsi 300.000 kr-it tikillugit taarsigassarsisitsisinnaavoq.

Imm. 2. Soraanermusiaqartutut isigineqarpuit inuit utoqqalinersiuteqarnissamik, siusinaartumik pensionisiaqarnissamik pisinnaatitaasut imaluunniit tjenestemand-itut pensionisiaqartut.

Imm. 3. Aappaasumut sanilliunneqarpoq nalunaarsorsimalluni aapparisaq, imaluunniit ukiuni 2-ini kingullerni inooqatigiissimappata, katissimanermut assingusumik inooqatigiinneq.

Imm. 4. Peqatigisaanik kapitali 3 naapertorlugu taarsigassarsisitsisoqarsinnaanngilaq.

§ 20. Inissiap atorneqarnerata imaluunniit atugaanerata allanngortinnissaanik siunertaqartunut imaluunniit kinguneqartunut imaluunniit inuulluarniutitut taaneqarsinnaasunut iluarsaassinerit pitsanngorsaannullu taarsigassarsisitsisoqarsinnaanngilaq.

§ 21. Iluarsaassinissamut taarsigassarsisitsinissamut, tak. § 19 piumasarineqarpoq:

- 1) Iluarsaassinerup aningaasalersornissaanut aningaaserivimmi imaluunniit illuummik qularnaveeqqusiilluni taarsigassarsisitsisarfinni nalinginnaasumik piumasaqaatit malillugit taarsigassarsinissamut itigartitaasimaneq.
- 2) Inissiaq ikuallattoornissamut aamma illup ajoqusersinnaaneranut sillimmaserneqarsimanissaa aamma sillimmasiinermit akiliutissani kinguaattoortoqarsimanginnissaa.
- 3) Inissiami piginneqataasup aappaasup iluarsaassinerit aamma taarsigassarsinissamut akuersisimanissaa.

§ 22. Kapitali manna malillugu inissiami tamarmiusumi qularnaveeqqusiussinikkut qulakkeerneqartumik taarsigassarsiatut ernialersorneqanngitsutut akilersugassaanngitsutullu taarsigassarsisitsisoqassaaq. Inissiami qularnaveeqqusiussinikkut taarsigassarsiaasinnaasut allat taarsigassarsinerup ataqqissavai.

§ 23. Kommunalbestyrelsip taarsigassarsisitsinera piginnittut nikinnerini akiligassanngortinneqassaaq, taarsigassarsisup taassumalu aappaata akornanni piginnittut nikinneri eqqaassanngikkaanni imaluunniit kommunalbestyrelse allamik aalajangiisimanngippat.

§ 24. Kommunalbestyrelsip taarsigassarsisitsinera tak. § 19 aamma akiligassanngortinneqassaaq:

- 1) Taarsigassarsisup inissiaq ikuaallattoornissamut illullu ajoqusersinnaaneranut sillimmasersimanngippagu.
- 2) Inissiaq attartortinneqarpat.
- 3) Inissiaq soraarnermusiaqartumut initut atorneqanngippat.
- 4) Inissiami ininik inuussutissarsiornermut aqqissuussisoqarsimappat imaluunniit inissiamiit inuussutissarsiummik ingerlatsisoqarpat. Inuussutissarsiutilli annikitsut namminersorfiusullu ilaanngillat.

Kapitali 4 a

Iluarsaassinernut, pitsanngorsaanernut alliliinernulluunniit tapiissutit

§ 24 a. Inissianut, inunnit ukiuni akileraarfiusuni kingullerni marlunni inunnit ukiumut 300.000 koruunit inorlugit isertitaqarsimasunit pigineqartunut, imaluunniit inunnit, ulloq manna tikillugu isertitarisimasaat apeqqutaatinngit siunissami qanittumi inoqutiginni ukiumut 300.000 koruunit inorlugit isertitaqartussatut naatsorsuutigineqartunit pigineqartunut annerpaamik 150.000 koruuninik inissiamik iluarsaassinermut, pitsanngorsaanermut imaluunniit alliliinermut kommunalbestyrelsi tapiissuteqarsinnaavoq.

Imm. 2. Taamaallaat inissiamut Namminersorlutik Oqartussanit taarsigassarsisoqarsimappat, imaluunniit maanna piginnittuusut taarsigassarsisuullutik Namminersorlutik Oqartussanit taarsigassarsisoqarsimappat kommunalbestyrelsi tapiissuteqarsinnaavoq.

Imm. 3. Meeqqanut sulii angerlarsimaffimmi najugaqartunut, 18-it inorlugit ukioqartunut, najukkami inuit nalunaarsorsimaffianni nalunaarsorsimasunut, taamaattorli amerlanerpaamik meeqqanut arfinilinnut, isertitassanut killigitat meeqqamut ataatsimut 4.000 koruuninik qaffanneqartassapput.

§ 24 b. Piffissaq qinnuteqarfiusoq sioqqullugu qaammatit 60-it kingulliit ingerlanerini pisortat inissiamik iluarsaassinissamut, pitsanngorsaanissamut alliliinissamulluunniit tapiissuteqarsimappata, kommunalbestyrelsi tapiissuteqarsinnaanngilaq.

Imm. 2. Inissianut sumiiffinni, nalinginnaasumik inissiaq qularnaveeqqusiullugu aningaaserivimmit imaluunniit realkreditimit taarsigassarsiviusinnaasuni inissisimasunut kommunalbestyrelsi tapiissuteqarsinnaanngilaq.

Imm. 3. Kommunalbestyrelsip § 24 a naapertorlugu qinnuteqaammik naliliinermini uku eqqarsaatigissavai:

- 1) iluarsaassinissap kissaatigisap annertussusissaa,
- 2) alliliinerup pitsanngorsaanerulluunniit qinnuteqartup pigisaanut nalilinnut aammalu nammineerluni suliaqarnissamut piginnaaneqarneranut sanilliunneqarnissaa, kiisalu
- 3) inissiap pisoqaassusia niuerutigineqarnermilu nalinga.

Imm. 4. Naalakkersuisut inissiamik iluarsaassinermut, pitsanngorsaanermut alliliinermulluunniit

maleruagassiorsinnaapput, taakkunungalugu aqutsineq, aningasat tunniunneqarnerat suliaassallu tapiiffigineqarsinnaatitaasut ilaatinneqarput.

Kapitali 5

Ataatsimut aalajangersakkat

Taarsigassarsinissamut qinnuteqaatinik aqutsineq il.il.

§ 25. Inatsisartut inatsisaat manna naapertorlugu suliamik suliarinninnermi aningaasartuutitut matussutissatut kommunalbestyrelsip taarsigassarsiarititat 0,5 procentiinik annertussuseqartumik akileeqqusisoqassaaq.

Imm. 2. Piffissami taarsigassarsisup taarsigassarsiat tunniuteqqullugit kommunalbestyrelsimut qinnuteqarfigisaani taarsigassarsisup akitsuut kommunalbestyrelsimut akilissavaa. Taamaattoq taarsigassarsianik tunniussinnermi akiliutissaq ilanngaatineqassasoq, kommunalbestyrelsi aalajangersinnaavoq.

§ 26. Kommunalborgstyrelsi qularnaveeqqusiinnermut allagartap atsiorneqarneranut atatillugu suliamik suliarinninnermut akitsuummik 1.250 kr.-inik akileeqqusisinnaavoq.

Imm. 2. Kommunalborgstyrelsi aningaaserivimmud ataatsimut amerlanerusulluunniit qularnaveeqqusiinnermi allagartap atsiorneqarnissaanut kiisalu akitsuummik akileeqqusinissamut piginnaatitsissummik tunniussisinnaavoq.

§ 27. Inissianik nutaanik sanaartornissamut qinnuteqaatit allakkatigut kommunalborgstyrelsimut nassiunneqassapput.

Imm. 2. Qinnuteqaammud ilanngunneqassapput:

- 1) Pilersaarummut nassuiaat inissiat amerlassusaannut inissiamullu ataatsimut inissiap annertussusaa pillugu paasissutissanik imaqqartoq.
- 2) Sanaartornermi aningaasartuutitut tamakkiisunut missingersuutit.
- 3) Kommunalborgstyrelsimiit nunaminertamik immikkoortitsineq imaluunniit nunaminertamik tunineqarneq.
- 4) Nammineerluni aningaasalersuutissat pissarsiarisimaneritut uppersarsaat, tak. § 9.
- 5) Qinnuteqartup cpr. normua, najugaqarnermut allagartaq imaluunniit alla kinaassutsimik erseqqissumik takutitsisoq.
- 6) Qinnuteqartup pisortanut akiitsoqarnera pillugu Akiliitsiniarnermut oqartussaniit nalunaarut.

Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalborgstyrelsi isummissaaq.

§ 28. Inissiani pioreersuni iluarsaassinernut, pitsanngorsaanernut allilerinernulluunniit taarsigassarsinissaq pillugu qinnuteqaat, kapitali 3 aamma 4 naapertorlugu, kommunalborgstyrelsimut allakkatigut nassiunneqassaaq.

Imm. 2. Qinnuteqaammud ilanngunneqassapput:

- 1) Iluarsaassinissamut, pitsanngorsaanissamut allilerinissamulluunniit kissaatigineqartumut nassuiaat.

- 2) Inissiaq pillugu nassuiaat, tassunga ilanngullugit pisoqaassusaa, angisussaa qanorlu pitsaassuseqarnera.
- 3) Suliassami aningaasartuutitut tamarmiusunut missingersuusaaq.
- 4) Sulineq pineqartoq nunaminertamik tunineqarnissamik pisariaqartitsippat kommunalbestyrelsimiit nunaminertamik immikkoortitsineq imaluunniit nunaminertamik tunineqarneq.
- 5) Nammineq aningaasalersuisinnaanermut uppersarsaat.
- 6) Qinnuteqartup cpr.normua aamma najugaqarnermut allagartaq.
- 7) Inissiamut piginnittuuneq pillugu uppersarsaat.
- 8) Qinnuteqartup pisortanut akiitsoqarnera pillugu Akiliisitsiniarnermut oqartussaniit nalunaarut.
Imm. 3. Qinnuteqaatit nassiunneqartut tunngavigalugit qinnutigineqartut aningaasaliissutigineqarsinnaanersut kommunalbestyrelsi isummissaaq.

§ 29. 25.000 kr.-it sinnerlugit pisortanut akiitsunik akilerneqartussanik akiliisimanngitsumut qinnuteqartumut taarsigassarsitsinissamut kommunalbestyrelsi neriorsuuteqarsinnaanngilaq.

§ 30. Taarsigassarsinissamik qinnuteqaat kommunalbestyrelsimiit akuerineqarpat taarsigassarsinissamut neriorsuut tunniunneqassaaq, tassanilu taarsigassarsiat annertussuserigallagassaat aammalu taarsigassarsinermi piumasaqaatit allassimassallutik.

Imm. 2. Kommunalbestyrelsip taarsigassarsitsinerani aningaasaliissutaasunut tunngavigineqartuni aningaasartuutitut missingersuutini allanngortoqarpat, allannguinerlu taarsigassarsiat inaarutaasumik annertussusiannut sunniuteqarpat, taarsigassarsinissamik qinnuteqartoq pisariaqanngitsumik kinguarsaanani tamanna kommunalbestyrelsimut nalunaarutigissavaa. Taamaattoqanngippat inaarutaasumik taarsigassarsiat neriorsuutigineqartuniit annertunerulersinneqarsinnaanngillat.

§ 31. Taarsigassarsiat inaarutaasumik annertussusaat sanaartornermi inaarutaasumik naatsorsuutit tunngavigalugit naatsorsorneqassapput. Sanaartornermi inaarutaasumik naatsorsuutit suliamut attuumassuteqanngitsumit uppersarsarneqassapput.

Imm. 2. Taarsigassarsinissamik qinnuteqartup nammineq sulinerata nalinga aningaasartuutitut tamarmiusunut ilaassanngilaq, tak. imm. 1. Tamannali sanaartornerup iluani taarsigassarsisoq ileqquusumik suliffeqarneranut atasumik taarsigassarsisoq suliaqarpat atuutissanngilaq.

§ 32. Inissiap sanaartorneqarnera, iluarsaanneqarnera, pitsanngorsarneqarnera allilerneqarneralu neriorsuutitut allakkiap tunniunneqarneraniit ukiut marluk iluanni aallartinneqareersimassaaq kiisalu ukiut pingasut iluanni naammassineqarsimallunilu atorneqalereersimassalluni. Taamaattoqanngippat neriorsuut siumoortumik nalunaarutigineqarani atorunnaarsinneqassaaq.

Imm. 2. Taarsigassarsisoq neriorsuutitut allakkiap tunniunneqarneraniit ukiut marluk iluanni suliniut aallartinneqarsimanersooq imaluunniit aallartinneqarsimannginnersoq pillugu kommunalbestyrelsimut paasissutissanik nassiussissaaq.

Imm. 3. Taarsigassarsisoq neriorsuutitut allakkiap tunniunneqarneraniit ukiut pingasut iluanni atuilernermit akuersissutip assilineranik kommunalbestyrelsimut nassiussissaaq.

Imm. 4. Kommunalbestyrelsi immikkut pisuni piffissami killissarititaasut imm. 1-imi allassimasuniit immikkut akuersissuteqarsinnaavoq.

Taarsigassarsianik tunniussineq

§ 33. Sanaartorneq, iluarsaassineq, pitsanngorsaaneq imaluunniit allilerineq naammassineqarpat aamma sanaartornermi naatsorsuutit uppersarneqarsimasut aamma qularnaveeqqusiussaqlarluni taarsigassarsinermi allagartap uparuagassartaqanngitsup naqeqqaarneranik nalunaarsorneqarsimasup naqissuserneqarsimasullu kiisalu ikuallattoornissamut illullu ajoqusernissaanut sillimmasiisimanermut uppersaatiptakutinneqarnerisigut taarsigassarsiat tunniunneqassapput. Taamaattorli aningaasaliissutit kommunalbestyrelsip missingersuusiatus akuerisaanni ukiumi ilanngunneqarfianni ukiumi siusinnerpaamik taarsigassarsiat tunniunneqarsinnaallutik.

Imm. 2. Sanaartornermi allilerinermilu taarsigassarsiat pissarsiarineqarnissaannut aamma piumasarineqarpoq atulernissaanut akuersissuteqarnissaq.

§ 34. Inatsisartut inatsisaat una naapertorlugu taarsigassarsiniartumut pisortanut akilerneqarsimanngitsunik akiitsoqartumut taarsigassarsiat tunniunneqarsinnaanngillat. Akiitsut akilerneqarsimanngitsut aqqinnissaannut taarsigassarsiat Akiliisitsiniartarfimmut kommunalbestyrelsip tunniutissavai. Nuussineq imaluunniit eqqartuussivikkut malersuineq naapertorlugu taarsigassarsianit iluanaarutissat sinneri taarsigassarsisumut imaluunniit pisussaatinneqartumut tunniunneqassapput.

Imm. 2. Taarsigassarsiat tunniunneqarnissaat sioqqullugu kommunalbestyrelsi taarsigassarsisup pisortanut akiitsoqarnerisigut pillugu Namminersorlutik Oqartussani Akiliisitsiniartarfimmit nalunaarummik pissarsiniassaaq.

Illup angissusia aamma kvadratmeterimut akit

§ 35. Inissiap annertussusaa inissiami init tamarmik annertussusaattut naatsorsorneqassaaq, tak. imm. 2. Pequusiviit, quit, biilnut oqqussiviit, aneerasaartarfii imaluunniit biilit unittarfii, illup silammut iigaasa avataaniittut imaluunniit inissiamit immikkoortillugit inissiat naatsorsuineri ilanngunneqassanngillat, taakku oqorsarlugit inigissassat atorineqassanngippata.

Imm. 2. Inissiap annertussusaa imatut naatsorsorneqassaaq:

- 1) Naqqup ataani inissiap annertussusaa naqqup ataata silammut iigaaniit illup takissusaanut silissusaanullu amerlisitsilluni naatsorsuinikkut uuttorneqassaaq. Naqqup ataa tamakkerluni atorineqanngippat, inissiap annertussusaa illup iluani iikkat ininik immikkoortitsissutaasut qeqqaniit uuttisoqassaaq. Init nateqanngitsut naqqi tamakkerlutik cementimik beton-imiluunniit qallerneqarsimasut uuttortaanermi ilanngunneqassanngillat.
- 2) Inissiap quleriinnerni init quleriinni nalinginnaasumiittut inissiami ataatsimi silami iikkamiit imaluunniit qaliata silataani iikkamiit, tak. nr. 3, aamma inissiap avinnerata qeqqaniit annertussuseq uuttorneqassaaq. Ilaqutariinnut arlalinnut inissiani uuttortaanermi illup isua iikkatut inissianut immikkoortitsissutaasut affartut nalilerneqartarpoq. Qisuit qalliutaasut marluuppata ataatsip uuttorneqarnera qisuup allip silataaniit uuttisoqassaaq.
- 3) Qaliani inissiap annertussusaata naatsorsornerani, illup takissusaanut silissusaanullu amerlisitsilluni naatsorsuinikkut uuttisoqassaaq. Takissuseq inissiap quleriivini nalinginnaasuni uuttuisarnertut uuttorneqassaaq, silissuserlu silami qaliat qalliutaasa qalipaa naqqaniit 1,5 meterinik portussuseqartut akornanni uuttorneqassalluni. Ilassutit, soorlu aniinganerit, iikkat inimit killiliissutaasut silataannit

uuttorneqassapput.

Imm. 3. Naqqup ataani qalianilu init imm. 2, nr. 1-imi aamma 3-mi taaneqartut aatsaat najugassatut ilusilersorneqarsimappata, init annertussusaat uuttortaanermut ilanngunneqassapput.

Imm. 4. Init aalajangersimasumik nateqanngitsut uuttortaanermut ilanngunneqassanngillat, taamaattorli tak. imm. 5.

Imm. 5. Inissiami majuartarfiit annertussutsimik uuttortaanermi inini quleriinni atorineqarfigisaminni ilanngunneqassapput. Iserterfiit, majuartarfiit majuartarfillu sangoriaat ataatsimut atorineqartut, illup silammut iigaasa iluini inini kiassakkani inissisimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.

§ 36. Inissiap kvadratmeterimut akia inissiap sanaartornerani aningaasartuutit tamarmiusut inissiap initaanit tamarmiusunit agguarneqarnera tunngavigalugu naatsorsorneqassaaq.

Kapitali 6

Taarsigassarsiat inaarlugit akilerneqarneri

§ 37. Inissianik nutaanik sanaartornermut taarsigassarsiaasunik piffissaq sioqqullugu taarsigassarsisup taarsigassarsianik inaaraluni akiliinerani akiitsut sinneri ullormi qinnuteqaatip tunniunneqarnerani 3 %-imik ernialerlugit Nationalbankip erniaritittagai ilanngullugit akilersukkat kingumut naatsorsorneqassapput. Akiitsut sinneri taarsigassarsisup allakkatigut inaarilluni akiliinissaq pillugu noqqaaneriit aamma taarsigassarsiani piffissamut ernialersuiffunani akilersuiffiusussaangitsumut sinneruttumut kingumut naatsorsorneqassapput, taamaattorli taarsigassarsiat tunniunneqarneranniit siusinnerpaamik ukiunut tallimanut.

Kapitali 7

Atulernissaanut, atorunnaarsitsinermit ikaarsaarnermullu aalajangersakkat

§ 38. Inatsisartut inatsisaat ulloq 1. januar 2018-imi atuutilissaaq.

Imm. 2. Peqatigisaanik illuliortiternermi aningaasalersuineq pillugu Inatsisartut peqqussutaat nr. 1, 7. maj 2007-imeersoq atorunnaarsinneqarpoq.

§ 39. Taarsigassarsiat aamma taarsigassarsinissamut neriorsuinerit, ulloq 1. januar 2018 sioqqullugu tunniunneqarsimasut imaluunniit nalunaarutigineqarsimasut piumasaqaatit allanngortinnagit ingerlatiinnarneqassapput.

Imm. 2. Inatsisartut inatsisaanni matumani § 37-mi pineqarput inissianik nutaanik sanaartornermut taarsigassarsiat aamma taarsigassarsinissamut neriorsuineq 1. januar 2018-ip kingorna tunniunneqartut imaluunniit nalunaarutigineqartut.

§ 40. Qinnuteqartut, ulloq 1. januar 2018 sioqqullugu taarsigassarsinissaq pillugu neriorsorneqarsimasut taarsigassarsiallu tunniunneqarsimanatik, qinnuteqartoqarneratigut inatsisartut inatsisaanni matumani maleruagassat naapertorlugit taarsigassarsinissamut neriorsuummik nutaamik nalunaarfigineqarsinnaapput.

Inissianik aningaasalersuisarneq pillugu Inatsisartut inatsisaat nr. 36, 28. november 2019-imeersoq (Inissialiortiternermut tapiissutitalimmik illulianik iluarsaassinermut, pitsanngorsaanermut alliliinermullu taarsigassarsititsisarneq tapiissuteqartarnerlu)[\[1\]](#) imatut atortuulersitsinermut aalajangersagaqarpoq:

§ 2

Inatsisartut inatsisaat 1. januar 2020-mi atuutilerpoq.

Ineqarnermut Attaveqaaqatigiinnermullu Naalakkersuisoqarfik, ulloq 7. februar 2020

Ruth Lindhardt

/

Jeanette Holding

[\[1\]](#) Inatsimmi allannguutit ukuupput §§ 1-3, § 24 a aamma § 24 b.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

